

Na osnovu članova 10. i 12. Zakona o udruženjima i fondacijama Bosne i Hercegovine, ("Službeni glasnik BiH", broj: 32/01, 42/03, 63/08 i 76/11), Osnivačka skupština Alumni asocijacije inženjera elektrotehnike, na sjednici održanoj 20.1.2015. godine u Istočnom Sarajevu, donosi :

# STATUT

## Alumni asocijacije inženjera elektrotehnike

### I OPŠTE ODREDBE

#### Član 1.

Alumni asocijacija inženjera elektrotehnike (u daljem tekstu: Udruženje), je dobrovoljna, neprofitna, nevladina organizacija čiji članovi mogu postati lica koja su završila dodiplomski ili postdiplomski studij na Elektrotehničkom fakultetu u Istočnom Sarajevu (u daljem tekstu ETF), ali i druga lica, radi ostvarivanja ciljeva i djelatnosti Udruženja utvrđenih ovim Statutom.

#### Član 2.

U skladu sa članom 12. Zakona ovim statutom propisuje se sljedeće:

- puni naziv, sjedište i adresa Udruženja;
- ciljevi i djelatnosti,
- postupak za primanje i isključivanje članova;
- organi Udruženja, postupak i način na koji se biraju, ovlaštenja koja imaju, kvorum i pravila glasanja, trajanje mandata, lice ovlašteno da sazove skupštinu, uslovi i način raspuštanja odnosno prestanka rada;
- postupak za izmjene i dopune statuta, ovlaštenja i donošenje drugih opštih akata Udruženja;
- javnost rada;
- pravila za ostvarivanje, korištenje i raspolaganje sredstavima Udruženja, kao i organ koji je ovlašten za nadzor nad korištenjem tih sredstava;
- podnošenje izvještaja o finansijskom poslovanju i radu Udruženja;
- opis oblika i sadržaj pečata;
- zastupanje Udruženja;
- uslovi i postupak spajanja i podjele Udruženja, uključujući bilo kakav poseban kvorum ili pravila kvalifikovane većine i postupak glasanja;
- postupak za raspolaganje preostalim imovinom ili drugim sredstvima, u slučaju raspuštanja ili prestanka rada Udruženja;
- ostala pitanja u vezi rada i djelovanja Udruženja u skladu sa Zakonom i Statutom.

## II NAZIV, SJEDIŠTE I PODRUČJE DJELOVANJA

### Član 3.

Naziv Udruženja je:

- Алумни асоцијација инжењера електротехнике
- Alumni asocijacija inženjera elektrotehnike
- Alumni asocijacija inženjera elektrotehnike

### Član 4.

Sjedište Udruženja je: Vuka Karadžića 30, 71123 Istočno Sarajevo.

### Član 5.

Udruženje djeluje na teritoriji Bosne i Hercegovine.

### Član 6.

Udruženje može promijeniti naziv i sjedište, o čemu odluku donosi Skupština Udruženja u skladu sa Zakonom i ovim Statutom.

### Član 7.

Udruženje stiče svojstvo pravnog lica sa pravima, obavezama i odgovornostima danom upisa u registar kod nadležnog ministarstva.

## III PEČAT

### Član 8.

Udruženje ima pečat koji je izrađen u dva primjerka i označen brojevima 1 i 2.

Pečat Udruženja označen brojem 1 je okruglog oblika prečnika 30 mm u kojem je uz unutrašnji obod kruga ćiriličnim pismom upisan tekst: Алумни асоцијација инжењера електротехнике, a u sredini sjedište: Источно Сарајево. U donjoj polovini kruga je uz unutrašnji obod kruga upisan broj 1.

Pečat Udruženja označen brojem 2 je okruglog oblika prečnika 30 mm u kojem je uz unutrašnji obod kruga latiničnim pismom upisan tekst: Alumni asocijacija inženjera elektrotehnike, a u sredini sjedište: Istočno Sarajevo. U donjoj polovini kruga je uz unutrašnji obod kruga upisan broj 2.

#### **IV CILJEVI I DJELATNOSTI UDRUŽENJA**

##### **Član 9.**

Ciljevi i djelatnosti udruženja su:

- uspostavljenje i održavanje veza Elektrotehničkog fakulteta u Istočnom Sarajevu i njegovih diplomiranih studenata, magistara i doktora nauka,
- povezivanje i unapređenje saradnje članova udruženja,
- očuvanje tradicije i ugleda Elektrotehničkog fakulteta u Istočnom Sarajevu,
- unapređenje saradnje Elektrotehničkog fakulteta u Istočnom Sarajevu sa srodnim institucijama u BiH i svijetu, te sa privrednim subjektima i lokalnom zajednicom,
- rad na unapređenju kvaliteta nastavno-naučnih aktivnosti na Elektrotehničkom fakultetu u Istočnom Sarajevu, u saradnji sa privrednim subjektima,
- promocija elektronskog učenja i upotrebe inovativnih rješenja za unapređenje kvaliteta obrazovanja u obrazovnim institucijama,
- unapređenje znanja, vještina i kompetencija članova udruženja kroz projekte i aktivnosti cjeloživotnog učenja, radionice, seminare, okrugle stolove i konferencije,
- promocija i afirmacija uloge obrazovanja i nauke u društvu,
- unapređenje kvaliteta života građana BiH kroz obrazovne, naučne, razvojne, infrastrukturne, ekološke i projekte zaštite životne sredine,
- izdavanje vodiča, brošura, mapa i drugih publikacija u svrhu ostvarivanja ciljeva i djelatnosti Udruženja, u skladu sa Zakonom,
- rad na organizaciji radionica, seminara, okruglih stolova i konferencija u cilju ostvarivanja ciljeva i djelatnosti Udruženja.

#### **V ČLANSTVO U UDRUŽENJU**

##### **Član 10.**

Učlanjenje članova Udruženja se vrši popunjavanjem pristupnog obrasca u elektronskoj ili papirnoj formi ili odlukom Skupštine Udruženja.

Članovi Udruženja se vode u evidenciji članova.

Članovi Udruženja koji plaćaju godišnju članarinu su ujedno i članovi Skupštine Udruženja.

Odluku o plaćanju i visini godišnje članarine donosi Skupština Udruženja.

##### **Član 11.**

Članovi Udruženja mogu biti:

- redovni članovi,
- podupirući članovi,
- počasni članovi.

##### **Član 12.**

Redovni članovi Udruženja mogu biti lica koja su završila dodiplomski ili postdiplomski studij na ETF-u, kao i druga lica koja se zalažu za ostvarivanje ciljeva Udruženja i koja prihvataju Statut Udruženja.

##### **Član 13.**

Podupirući članovi mogu biti pravna ili fizička lica koja doprinose ostvarivanju ciljeva Udruženja.

Podupiruće članove imenuje Skupštine Udruženja na prijedlog Predsjednika Udruženja.

#### Član 14.

Počasni članovi mogu biti lica koja su svojim radom i zalaganjem posebno doprinijela razvoju Udruženja i ostvarivanju njegovih ciljeva.

Odluku o imenovanju počasnog člana donosi Skupština Udruženja na prijedlog Predsjednika Udruženja.

#### Član 15.

Članstvo u Udruženju prestaje:

- na vlastiti zahtjev, potpisivanjem izjave o istupanju iz Udruženja,
- isključenjem u slučaju djelovanja protivno ciljevima i Statutu Udruženja,
- smrću člana Udruženja,
- prestankom rada Udruženja.

Isključenje iz članstva se vrši u slučaju kada član Udruženja teže povrijedi odredbe ovog Statuta ili drugih pravila Udruženja ili ako djeluje protivno ciljevima i interesima Udruženja.

Odluku o prestanku svojstva člana udruženja donosi Predsjednik udruženja.

Lice koje je nezadovoljno odlukom iz prethodnog stava, može podnijeti žalbu Skupštini Udruženja u roku od 15 dana od dana prijema odluke.

Skupština razmatra žalbu iz prethodnog stava na prvoj narednoj sjednici i na istoj donosi konačnu odluku.

### **VI PRAVA, DUŽNOSTI I ODGOVORNOSTI ČLANOVA**

#### Član 16.

Prava članova Udruženja su:

- da biraju organe Udruženja i da u njih budu birani,
- da daju prijedloge, mišljenja i sugestije,
- da prate rad Udruženja i pokreću inicijative za rješavanje pitanja od interesa za Udruženje,
- da budu redovno informisani o radu i rezultatima rada organa Udruženja,
- da u zaštiti svojih prava koriste pomoć Udruženja.

## Član 17.

Dužnosti članova Udruženja su:

- da učestvuju u aktivnostima Udruženja,
- da savjesno i odgovorno izvršavaju poslove i zadatke u vezi sa radom Udruženja,
- da promovišu djelatnost Udruženja,
- da redovno izvršavaju preuzete obaveze prema Udruženju i provode odluke, stavove i zaključke organa Udruženja,
- da se pridržavaju odredaba ovog Statuta.

## VII ORGANI UDRUŽENJA

### Član 18.

Organi Udruženja su:

- Skupština,
- Predsjednik,
- Sekretar.

### Član 19.

Skupština je najviši organ Udruženja, a čine je svi članovi Udruženja koji plaćaju godišnju članarinu.

Skupština se sastaje u redovnim i vanrednim zasjedanjima.

Redovna zasjedanja Skupštine se održavaju najmanje jednom u toku godine.

Vanredna skupština zakazuje se po potrebi i na zahtjev:

- Predsjednika Udruženja,
- Najmanje jedne trećine članova Skupštine.

Kvorum Skupštine čini minimalno 50% od ukupnog broja članova Skupštine Udruženja.

Zasjedanje Skupštine se zakazuje najmanje 15 (petnaest) dana prije dana zasjedanja.

### Član 20.

Skupština punovažno odlučuje nadpolovičnom većinom prisutnih članova Skupštine Udruženja, ukoliko ovim Statutom nije drugačije određeno, odnosno ako je za određena pitanja potrebna kvalifikovana većina.

Glasanje na sjednici je javno, izuzev ukoliko Skupština na samoj sjednici ne utvrdi drugačije.

### Član 21.

Skupština, kao najviši organ Udruženja, ima sljedeća ovlaštenja:

- donosi statut Udruženja, njegove izmjene i dopune i druge opšte akte Udruženja,
- donosi finansijski plan i usvaja izvještaj o izvršenju finansijskog plana Udruženja,
- usvaja godišnji program rada Udruženja,
- imenuje i razrješava Predsjednika Udruženja,

- imenuje i razrješava Predsjednika Skupštine Udruženja,
- imenuje i razrješava Sekretara Udruženja,
- donosi odluku o licu ovlaštenom za zastupanje i predstavljanje Udruženja,
- donosi odluku o plaćanju i visini godišnje članarine,
- donosi odluku o proglašenju počasnih članova Udruženja,
- daje autentično tumačenje ovog Statuta,
- djeluje kao drugostepeno tijelo u žalbenom postupku,
- odlučuje o pripajanju, razdvajanju, transformaciji i prestanku rada Udruženja, kao i o drugim statusnim promjenama Udruženja,
- donosi odluku o raspodjeli imovine i sredstava u slučaju prestanka rada Udruženja,
- obavlja druge poslove koji nisu u nadležnosti ostalih organa Udruženja.

#### Član 22.

Skupštinom predsjedava Predsjednik Skupštine, koji se bira na period od 4 (četiri) godine, s mogućnošću reizbora.

Zapisnik sa sjednica Skupštine vodi Sekretar Udruženja ili drugo lice koje privremeno ovlasti Predsjednik Skupštine.

#### Član 23.

Predsjednik Skupštine Udruženja vrši sljedeće aktivnosti:

- saziva sjednice Skupštine,
- predlaže dnevni red sjednice,
- predsjedava sjednicama Skupštine,
- potpisuje akte donesene na Skupštini,
- stara se o izvršavanju odluka, zaključaka i drugih akata Skupštine,
- koordinira rad Skupštine,
- obavlja i druge poslove koje mu odredi Skupština u skladu sa Zakonom i ovim Statutom.

#### Član 24.

Predsjednik Skupštine može biti razriješen i prije isteka mandata i to u sljedećim slučajevima:

- na sopstveni zahtjev,
- ako ne obavlja savjesno povjerene poslove i zadatke,
- u drugim slučajevima predviđenim Zakonom i ovim Statutom.

#### Član 25.

Predsjednika Udruženja imenuje i razrješava Skupština nadpolovičnom većinom glasova prisutnih članova Skupštine.

Mandat Predsjednika Udruženja je 4 (četiri) godine, sa mogućnošću reizbora.

Mandat Predsjednika Udruženja prestaje istekom, ostavkom ili smjenom.

Predsjednik Udruženja za svoj rad odgovara Skupštini Udruženja.

## Član 26.

Nadležnosti Predsjednika Udruženja su:

- zastupa i predstavlja Udruženje,
- provodi politiku i druge odluke koje je donijela Skupština,
- naredbodavac je u izvršenju finansijskog plana,
- vodi poslovanje i donosi odluke u okviru programa rada i planova razvoja Udruženja,
- određuju izvedbene planove i radne zadatke,
- odgovoran je za zakonitost i poslovanje Udruženja,
- priprema i predlaže donošenje svih akata iz nadležnosti Skupštine Udruženja,
- donosi opšta akta, izuzev onih koji su u izričitoj nadležnosti Skupštine,
- prati realizaciju finansijskog plana udruženja,
- izvršava odluke Skupštine,
- upravlja imovinom Udruženja,
- donosi odluku o isključenju članova iz Udruženja u prvom stepenu,
- donosi Pravilnik o disciplinskoj odgovornosti,
- ima i druga prava i obaveze utvrđene opštim aktima Udruženja i zakonom i koje mu stavi u nadležnost Skupština udruženja.

## Član 27.

U slučaju da Predsjednik Udruženja prestane obavljati svoju dužnost, Skupština je dužna pokrenuti postupak izbora Predsjednika Udruženja u roku od 30 dana.

## Član 28.

Sekretara Udruženja imenuje Skupština nadpolovičnom većinom glasova prisutnih članova Skupštine.

Sekretar Udruženja brine o svim administrativno-tehničkim i finansijskim poslovima Udruženja.

Sekretar Udruženja pomaže Predsjedniku u obavljanu svih poslova i ima uvid u sve aktivnosti i poslove Udruženja.

Sekretar Udruženja bira se na period od 4 (četiri) godine sa mogućnošću reizbora.

## **VIII KOMISIJE I RADNA TIJELA**

### **Član 29.**

Radi razmatranja i odlučivanja o pitanjima iz djelokruga Udruženja, Skupština Udruženja može formirati stalne ili povremene komisije.

Sastav i djelokrug komisije se utvrđuje odlukom Skupštine Udruženja.

## **IX PRIHODI I IMOVINA**

### **Član 30.**

Udruženje može ostvarivati prihode iz sljedećih izvora:

- prihodi od članarine,
- dobrovoljni prilazi i pokloni javnih institucija, fizičkih i pravnih lica, kako stranih tako i domaćih, u gotovini, uslugama ili imovini bilo koje vrste,
- državne subvencije ili ugovor sa državom, javnim institucijama, fizičkim i pravnim licima, kako domaćim tako i stranim,
- prihod od kamata, dividendi, dobiti od kapitala, zakupnina, honorara i sličnih izvora pasivnog prihoda,
- prihod stečen kroz ostvarivanje ciljeva i djelatnosti Udruženja, kako je određeno ovim Statutom.

### **Član 31.**

Ostvarivanje, korištenje i raspolaganje sredstvima Udruženja utvrđuje se finansijskim planom kojeg donosi Skupština na prijedlog Predsjednika udruženja.

O korištenju sredstava u skladu sa finansijskim planom odlučuje Predsjednik Udruženja.

Udruženje je dužno da uredno vodi poslovne knjige u skladu sa opšteprihvaćenim računovodstvenim principima i da sastavlja finansijske izvještaje u skladu sa relevantnim zakonima.

### **Član 32.**

Nadzor nad korištenjem sredstava vrši Skupština Udruženja.

Skupština je nadležna za kontrolu svih dokumenata, koji se odnose na finansijsko poslovanje, a posebno finansijskih izvještaja.

Dokumente iz prethodnog stava Skupština razmatra na redovnoj godišnjoj sjednici, a ako je potrebno i vanrednoj sjednici Skupštine, te iste podnosi nadležnim organima u skladu sa Zakonom i drugim propisima i ovim Statutom.



## **X JAVNOST RADA**

### **Član 33.**

Rad Udruženja je javan. Javnost rada ostvaruje se neposrednim informisanjem i putem sredstava javnog informisanja za značajnije aktivnosti.

Članovima Udruženja omogućen je uvid u obavljanje aktivnosti na svim područjima na kojima djeluje Udruženje, kao i planiranje daljih aktivnosti.

### **Član 34.**

Članovi Udruženja trebaju biti redovno informisani o radu Udruženja. Za javnost rada odgovoran je Predsjednik Udruženja.

## **XI POSTUPAK ZA IZMJENU I DOPUNU STATUTA**

### **Član 35.**

Skupština je nadležna za donošenje Statuta, izmjene i dopune Statuta i drugih opštih akata Udruženja.

Izmjene i dopune Statuta Udruženja usvaja Skupština, dvotrećinskom većinom glasova ukupnog broja članova Skupštine.

Inicijativu za izmjene i dopune Statuta može podnijeti Predsjednik Udruženja ili jedna trećina članova Udruženja.

### **Član 36.**

Udruženje može pored Statuta imati i druge opšte akte kojima se reguliše rad Udruženja i njegovih organa.

## **XII SPAJANJE, PODJELA I PRESTANAK RADA UDRUŽENJA**

### **Član 37.**

Udruženje se može spojiti i podijeliti samo u drugo udruženje u skladu sa Zakonom.

Odluku iz prethodnog stava donosi Skupština dvotrećinskom većinom svih članova Skupštine.

### **Član 38.**

Udruženje može prestati sa radom dobrovoljno na osnovu odluke Skupštine, ili po sili zakona.

Inicijativu za prestanak rada Udruženja može dati jedna trećina članova Udruženja, u sljedećim slučajevima:

- ako je proteklo dvostruko više vremena od vremena za održavanje Skupštine utvrđenog ovim Statutom, a Skupština Udruženja nije održana,
- ako se broj članova Udruženja smanji ispod broja tri.

Odluku o dobrovoljnom prestanku rada donosi Skupština udruženja dvotrećinskom

većinom svih članova Skupštine Udruženja.

Istovremeno Skupština usvaja plan likvidacije Udruženja, kojim se utvrđuje raspored imovine, prava i obaveze Udruženja u skladu sa Zakonom i ovim statutom, s tim što je prethodno neophodno izmiriti zakonske i ugovorne obaveze.

Skupština imenuje likvidatora Udruženja čija dužnost je da se stara o sastavljanju plana likvidacije i isti dostavlja Skupštini na usvajanje.

Preostala imovina, nakon podmirenja obaveza iz prethodnog stava, će se dodijeliti drugom udruženju, koje obavlja istu ili sličnu statutarnu djelatnost, a na osnovu odluke Skupštine Udruženja.

### **XIII ZASTUPANJE I PREDSTAVLJANJE**

#### **Član 39.**

Udruženje u pravnom prometu predstavlja i zastupa Predsjednik Udruženja, u okviru ovlaštenja utvrđenim ovim Statutom i Zakonom.

#### **Član 40.**

U postupcima u kojima Udruženje učestvuje kao stranka radi ostvarivanja svojih prava, dužnosti i obaveza pred nadležnim organima, Predsjednik Udruženja može dati pismenu punomoć za zastupanje Udruženja drugoj osobi.

### **XIV ZAVRŠNE ODREDBE**

#### **Član 41.**

Tumačenje odredbi ovog Statuta daje Skupština Udruženja.

#### **Član 42.**

Ovaj Statut stupa na snagu danom donošenja, a primjenjivaće se od dana upisa u registar udruženja kod nadležnog ministarstva.